



## 豬肉角

屋下書櫥頂園一粒黃白黃白紋个海螺殼，係賣豬肉个廷義伯退休後送分吾爸个，螺殼油潤油潤帶一息淡淡个豬肉香。殼面分豬肉哥幾下十年个摸摸撘撘，已經界摸到金那那仔，邊脣有鑽一個空，溜割絲索打一個索圈，做得掛在車頭項，尖尖个螺殼尾鋸忒一息，變一個像五個銀个銀角仔恁大个空，做得歎出「嘟！嘟」个聲音，俚將佢安作豬肉角。

恤起還細時節，莊肚龍頸溪頂高攔水个早仔角埤，係蔭附近田坵重要个埤圳，水關邊有一間阿菁姐開个細店仔，對番釘、笠嫲、菸酒、面帕板，項項都有賣。逐朝晨七點零，店前榕樹下會響起「嘟！嘟嘟！嘟嘟嘟！」个螺角聲，廷義伯个螺角歎三長聲後，佢會在該跡位等點零鐘，分人客有氣盡致斫豬肉。愛徙位前半點鐘佢會再歎一擺螺角，村民都知得兩遍豬肉角響後，就愛過作緊去割豬肉，係無豬肉伯就過家換坵賣咧。頭遍螺角聲響起時，佢共快走去同阿姆講：「阿姆！賣豬肉个來地！」毋過，阿姆都怙索索仔，像啞咗毋搭佢，詐事無聽到佢講个話，佢趕燒趕熱喊阿姆割兜豬肉來煮，佢講：「細人仔莫吵耳吵鼻，阿姆煮麼个，你就食麼个，隨食隨餐莫恁多嫌張。」其實啊！佢屋家隻過月無食到豬肉咧，肚屎豺到半晝半暗就肚蓋飢，變手軟腳犁个軟腳蟹，阿姆講佢血糖低拿圓糖仔分佢含，圓糖仔緊縻緊肚飢，係有一息豬油來攪飯食，就嶄然爽口，毋會肚豺豺仔。

外孫仔轉來寮，纏到無一時間，歸屋仔跳上跌落个三姊妹，拚等豬肉角問佢，這粒田螺殼特別大粒愛仰地搞？佢同佢等講這係海螺殼，頭擺仔賣豬肉个豬肉伯歎个。佢拿起螺角歎分佢等聽，「嘟嘟！」聲響起時，三隻孬嘍仔暢到飆起來，相爭搶佢手項个螺角愛拿去歎，搶來搶去煞跌落地泥下，壞蹄咧！膏馬車油地！螺殼驚怕必忒咧，三姊妹企在怙怙毋敢停動。佢遽遽拈起螺殼檢查一下，無兩尺高跌下去，又在軟泥項毋係三過土，該載，老海螺殼本本好好無必忒。

小學三年生个大孫女先歎，螺角尾對準嘴用力歎風，煞力牯歎都毋會出聲，歎到無志願交分老弟，孫仔出力歎幾下共樣無聲無說，將螺角交分三歲个老妹手項，細孫女拚等螺角緊看佢躑躑地噓，細聲細意同佢講：「阿公教佢歎！」。三隻孫猴仔企坐共下教，將有開空个螺角尾對準嘴角脣，對肚屎肚搗風，再對嘴脣歎向螺角「嘟！嘟！」聲就響出來咧。大个兩隻歎地出一息聲音，細孫女還係歎無聲。

螺角聲係童年蓋錫人个鄉音，乜係前輩賺錢之聲，「豬肉角」佢歎分俵仔、孫仔聽，佢同子孫講：「謀生之音愛使暗力歎正會響。」

作者：李得福

### ☆詞彙學習☆

- |                               |                            |
|-------------------------------|----------------------------|
| 【溜割絲索】liu god` xi` sog`：串瓊麻繩。 | 【嫌張】hiam` zong`：挑剔。        |
| 【有氣盡致】iu` iong` qin zii：慢慢來。  | 【緊縻】gin` moi`：含著蠕動。        |
| 【斫豬肉】zog` zu` ngiug`：選買豬肉。    | 【膏馬車油】go` ma` ca` iu`：糟糕了。 |
| 【孬嘍仔】o` lo` e`：小孩子的暱稱。        | 【無志願】mo` zii ngian：沒有耐心了。  |